

REBEKAH MBIET AÑWAN-NDỌ CHRIST

Genesis 24:34-67

ỌYỌHỌ UKPEP-ÑKPỌ 13

Eke Ikpọ Owo

IKỌ IBUOT: “Eyak nnyin idara inyuñ idat esit, inyuñ inọ enye ubọñ; koro ekem ini ndọ Eyen-erọñ, Ñwan Esie otim idem ebeñe Enye” (Eriyarare 19:7).

I Eyen-Ufọk Abraham Etiñ Abaña Utom Emi Edọñde Enye

- 1 Enye etiñ abaña Isaac, eyen Abraham, ye udeme emi eñwọñdẹ enọ enye, Genesis 24:34-36; 13:14, 15
- 2 Ema enọ Eliezer utom ediyom nnen-nnen añwan nnọ Isaac, Genesis 24:37-41
- 3 Enam udomo ke mben obube mmọñ, ndien iborọ onyuñ ọfọn, Genesis 24:42-46; Ñwed Mbon Rome 12:1
- 4 Ebana enye emi oyomde ndidi ñwan-ndọ idem, Genesis 24:47, 48

II Ikot Emi Ekeyerede

- 1 Eliezer etiñ owut uduak esie añwa-añwa, Genesis 24:49; Eriyarare 22:17
- 2 Emek Rebekah ke akpatre, Genesis 24:50-48; Isaiah 1:19
- 3 Enọ oruk Rebekah mme enọ, Genesis 24: 53
- 4 Rebekah ọbọ mme eridiọñ unyọñ, onyuñ ọtọñọ isañ ndika obufa ufọk iduñ esie, Genesis 24:59-61

III Edisobo Isaac Ye Rebekah

- 1 Isaac ebet ñwan-ndọ esie ke mfuñ-mfuñ mbubreyo, ke ama akaka iñwañ ndisaña ñkere, Genesis 24:62, 63; Zechariah 14:7; Matthew 25:10
- 2 Rebekah ebeñe idem ndisobo ye ebe-ndọ, Genesis 24:64, 65; Eriyarare 19:7
- 3 Edisobo ada itie, Genesis 24:66, 67; 1 Ñwed Thessalonica 4:16-18; Matthew 24:26-28.

SE EKPEPDE EBAÑA

Udeme Nnyin Ke Christ

“Jehovah ama ọdiọñ ete mi eti-eti, enye onyuñ okpon, Enye ama onyuñ ọnọ enye erọñ ye enań, ye silver, ye gold, ye ifin iren, ye ifin iban, ye camel, ye ass.” Abraham ekedi akwa owo onyuñ akara ufọk emi ata ediwak ifin ekedude, edi enye ekenyene mkpasip adia-akpa kiet, Isaac. Se oruk ukpono eke edinọde enye emi omumde enye obuk onyuñ akabarede edi adia-akpa ke kpukpru se enye enyenede!

Okposuk edi nte Abraham ekedide andinyene nsinsi eñwọñọ, edi silver ye gold, erọñ ye enań esie, ekedi mme ñkpọ ibio ini, emi ke ekpri ini enye edikpade ọkpọñ. Mme inyene ye ukpono emi ekenọde ñwan eyen esie idighe se edade edomo ye ukpono emi ke mfọn ediyakde enọ kpukpru mmọ emi edisañade esim idaha ndikabare ndi ñwan-ndọ Christ. Kere baña ubọñ emi ediyararede ke ini ediyararede nditọ Abasi enyuñ edọhọ ete, “imenyene udeme ke se Abasi onimde, imasaña ye Christ inyene udeme” (Ñwed Mbon Rome 8:17). Ofuri ererimbot ke omomum mmum ke ubiak ye ọkpọsọñ ekikere, osuk ebet ini emi ediyararede Ñwan-ndọ Christ.

“Mfọmma Uyai”

John edima ama okut mbukpọñ uyai emi inua mikemeke nditiñ ke ini ekeyerarede ewut enye “ñwan-ndọ, ñwan Eyen-erọñ” (Eriyarare 21:9). Eti ifet odu ọnọ kpukpru ufọk Abasi emi efakde ndidi ñwan-ndọ ye adia-akpa! Nte afo ada mfefere-mfefere ndiwọñọre ñkpọñ ikot Spirit emi okotde fi ete akabare edi Ñwan-ndọ Christ?

Ndisim Idaha Eke Eyomde

“Ndien enye awara obiomore abañ esie ke afara efep, onyũ ọdọhọ ete, Nwọñ; nyenyũ nnọ mme camel fo eñwọñ nko.” Mmem-mmem edinam, edi enye ayarade idaha esit, emi ke ediwak ini ananade, oro edi owo ndinam se edọhọde enam; ke akande oro, ndinam mbe nte ekedọhọde, utom edinyime esit.

“Nyenyũ nkoĩ mmọñ nnọ mme camel for nko.” Utim ikanañ emi mbiet ikọ emi owutde idem ke itie n̄wed emi otim owut nte Abasi ọsọñde ikọ edisaña “itiat iba.” Mme owo oro eyamade ke mme ufañ Edisana N̄wed Abasi edi mmọ oro ekenamde mme uwa ema enyũ enam ọfọn ekan nte ekedọhọde mmọ enam.

Mme Enọ Emi Etode Enyọñ

Ke ini Spirit Abasi okutde esit eke etiede ntre; ọdọñ Enye didie ndibana enye ye mme mfọn heaven, emi edade edomo ye n̄kpọ mbanidem, mkpanuen utoñ, okpoho ubọk emi Eliezer ọkọñde Rebekah. Mme mfọn Spirit emi ọduhọde nte mbara emi otode Heaven edi mme mbana n̄kpọ Nwan-ndọ Christ. Mmọ edi mme nsọñ-urua n̄kpọ uto emi minyeneke ekọm urua emi Abasi ọnọde; ndien baba n̄kpọ kiet inọhọ ukpọñ uyai nte Spirit Abasi. Idem ọkpọ-iso owut uyama ubọñ emi odude ke esit ukpọñ emi enyañade enyũ enamde asana emi akade iso tutu Abasi añwaña Ukperedem-Edim esin ke ukpọñ esie.

Eyen-eka Rebekah eren ama okut ete ke eyen-eka esie ama osobo ye n̄kpọ emi ọkọkpuhọrede enye. Enye ama okut mbana-idem esie onyũ akabare okop inem ke owo Abasi emi. Ererimbot ikemeke ndinyaña ndikut, nnyũ mbup mbaña se inamde eyen Abasi ayama ntre ke ubọñ Abasi.

Yak Nnyin Ikubiat Ini

“Adañemi mmọ edemerere ke usen ubọk, enye ọdọhọ, ete, Mbufo eyak nnyọñ ntiene ete mi. Ndien eyen-eka esie ye eka esie ete, yak eyen añwan etie kaña ye nnyin baba usen duop; ndien enye eyeka.” Laban ama onyime ete ke n̄kpọ emi okoto Abasi ndien enye ikekemeke nditiñ idiok mme eti ndian, ntre enye ama odomo ndibiat ini. Edi ntem ke mme owo ewak ndinam eyenyime ete ke Gospel emi oto Abasi, nko ke ndusuk n̄kpọ edi se mme imọ ikpanamde edi mmọ esuk eyom ndinam nduduhọ esisit. Emi edi kiet ke otu n̄kari andidiok ke enye ọfiokde ete imọ ikemeke ndinam mme owo ekañ mme utom Abasi: yak mmọ esin ndinam esuk eka iso ntre esin ndinam. “Nnyin idinam didie ibọhọ edieke nnyin isinde erinyaña eke okponde ntem?” (Mme Hebrew 2:3).

“Ekunam mi mbigi” edi ikot emi spirit ọnọde kpukpru mmọ emi eyomde ndibiat ini.

Anie Edika?

Ke ekutde ọyọhọ esit udọñ eyen-ufọk emi, ye nte mmọ mikemeke ndinam enye etie ebighi, Laban ye eka esie edọhọ ete, “Nnyin iyekot eyen añwan edi, ibup uyo esie. “Ndien mmọ ekot Rebekah edi, enyũ edọhọ enye ete, Nte afo onyime ndika ye owo emi? Ndien enye ete, Nyeka.”

“Nte afo onyime ndika?” edi mbume emi Edisana Spirit obupde owo kiet kiet emi edide owo ufọk Christ. Emi edi mme usen mbeñidem, mme usen nduñore esit, adaña nte Spirit okotde Nwan-ndọ ete etiene nda-usuñ Imọ onyũ ọkpọñ kpukpru ima ererimbot emi (N̄wed Mbon Philippi 3:7, 8), man enye ekeme ndibe nduk ke ndibe ebiet Aba-Edikọñ.

“Nte afo onyime ndika ye owo emi?” – okposuk edi oro ọwọrọde ndidianare mkpọñ ubon? Nte afo eyesaña ke usuñ edikañ-idem ye ediwa-idem, okposuk enye ọwọrọde edikọñ obukidem ke eto, ye mme udọñ emi odude do, man Christ ekpedi kpukpru n̄kpọ? Nte afo omonyime idighe ndikpa nnọ Enye ikpọñ, edi ndidu uwem ediwa idem ke usen ke usen, man Gospel Esie akpasuana osim utit isọñ? Nte afo ke ononim inyene fo ke Heaven, man esit fo ekeme ndikere mme n̄kpọ enyọñ?

Ke ini Spirit ayararede ọnọ fi mme n̄kpọ uto Christ ye mme inyene Esie ke ubọñ, afo, ye Rebekah, eyedọhọ ete, “ami nyeka.” Okposuk edi usuñ isañ ke camel oyomde ye obu ye idiok-usuñ ye mmem-idem, edi nte afo asañade akpatre itiat ke usuñ oro onyũ emenerede enyin ke iñwañ ke mmfuñ-mmfuñ mbubreyo ndien afo onyũ okut mbukpọñ Ebe-ndọ fo, afo eyefiori, “Hallelujah!”

MME MBUME

1 Nso ke eyen-ufọk Abraham eketiñ ọnọ Rebekah ye ufọk mmọ abaña inyene Isaac?

- 2 Eliezer, eyen-ufok Abraham akanam didie ọdiọñọ ke ini ama okokut eyen-añwan emi Abasi ekemekde ọnọ Isaac ke ñwan?
- 3 Nso ke enye akanam ke enye ama okokut ete ke ima ikut owo emi ekeyomde?
- 4 Nte Rebekah ama ọnọ unyime esit esie, mme edi ikpọ owo ekemek enọ enye?
- 5 Ufok oro ema eyom eyen-ufok oro etie ebighi ye mmọ. Nso ke enye akanam abañna emi?
- 6 Nso ikedi ntak emi ekekade anyan usuñ ntre ndida ñwan nnọ Isaac?
- 7 Rebecca edi mbiet anie?
- 8 Isaac edi mbiet anie?
- 9 Ndidi ndisim ke mfuñ-mfuñ mbubreyo owut nso akpan ñkpọ?
- 10 Nso akpan eridiọñ ke ekenọ Rebecca ke ini enye ọkọnyọñde?